

Visoki predstavnik u obraćanju Vijeću sigurnosti UN-a: Posao u BiH „još uvijek nije gotov“



Pripadnici privilegirane političke elite u Bosni i Hercegovini i dalje stavljaju svoje lične interese prije interesa zemlje i njenih građana, rekao je danas visoki predstavnik Valentin Inzko u svom obraćanju Vijeću sigurnosti UN-a u New Yorku.

Uprkos znatnim povećanjima izvoza, opća ekonomska situacija i dalje je veoma teška, a prosječan građanin BiH i dalje teško može zadovoljiti svoje osnovne potrebe. Dinamika usvajanja zakona na nivou državnih institucija i dalje ni izbliza ne zadovoljava potrebe zemlje, budući da je tokom proteklih šest mjeseci daleko više zakona odbačeno nego što je usvojeno. Istovremeno, mnoge obavezujuće presude Ustavnog suda BiH još uvijek nisu provedene, rekao je visoki predstavnik.

Osporavanja Mirovnog sporazuma su također sve češća, a visokopozicionirani političari iz Republike Srpske nastoje iskoristiti dešavanja u Ukrajini za vlastite ciljeve. Visoki predstavnik je naročito izrazio bojazan da bi trenutna kontroverza oko pitanja prebivališta i biračkih prava mogla dovesti do sporova na terenu, te je pozvao sve koji su uključeni u rješavanje ovog pitanja da učine sve što je u njihovoj moći kako bi se izbjegao takav scenarij i kako bi se naponi fokusirali na usvajanje odgovarajućih odredbi na

državnom nivou. „Posebno je važno da niko ne bude diskriminiran na osnovu etničke pripadnosti ili zato što je povratnik“, rekao je visoki predstavnik.

Visoki predstavnik je upozorio da bi predizbornom kampanjom opet mogli dominirati pokušaji da se podignu međunacionalne tenzije kako bi se na taj način preusmjerila pažnja sa stvarnih pitanja s kojim se zemlja suočava, kao što su potreba da se provede reforma ekonomije i smanji stopa nezaposlenosti. Uz to, nespremnost političkih lidera da provedu presudu u predmetu Sejdić-Finci i nepostizanje dogovora o pitanju vojne imovine zaustavili su proces evroatlantskih integracija u BiH.

S pozitivnije strane, visoki predstavnik obavijestio je Vijeće sigurnosti da se pripreme za održavanje općih izbora u oktobru odvijaju planiranom dinamikom, da je BiH usvojila novi zakon o javnim nabavkama i da su poduzete bitne mjere kako bi se osiguralo funkcioniranje Ustavnog suda Federacije u punom kapacitetu. Visoki predstavnik je također pozdravio nedavnu posjetu srbijanskog premijera Aleksandra Vučića Sarajevu kao značajan korak ka pomirenju i boljoj regionalnoj saradnji.

Naglašavajući da posao u Bosni i Hercegovini „još uvijek nije gotov“, visoki predstavnik je pozvao međunarodnu zajednicu da, ujedinjena, podrži vrijednosti i principe mira, suživota, uzajamnog poštovanja i nepovredivosti suverenih država.

„To znači podršku onim snagama u BiH koje su spremne da zajednički rade na postizanju zdravih kompromisa potrebnih da bi zemlja krenula naprijed. Moramo čvrsto stati protiv onih koji žele da siju podjele i razjedinjenost“, rekao je visoki predstavnik.

[Kliknite ovdje](#) za kompletan tekst obraćanja visokog predstavnika Vijeću sigurnosti UN-a.